最上乘论

禅宗第五祖弘忍 述

凡趣圣道悟解真宗,修心要论,若其不护净者,一切行无由取见; 愿善知识如有写者,用心无令脱错,恐误后人。

夫修道之本体,须识当身;心本来清净,不生不灭无有分别,自 性圆满,清净之心,此是本师,乃胜念十方诸佛。

问曰:"何知自心本来清净?"

答曰: "《十地经》云: 『众生身中有金刚佛性, 犹如日轮, 体明圆满, 广大无边, 只为五阴黑云之所覆, 如瓶内灯光, 不能照辉。』譬如世间云雾, 八方俱起, 天下阴闇。日岂烂也, 何故无光? 光元不坏, 只为云雾所覆; 一切众生清净之心, 亦复如是。只为攀缘妄念烦恼诸见, 黑云所覆, 但能凝然守心, 妄念不生, 涅盘法自然显现。故知自心, 本来清净。"

问曰: "何知自心本来不生不灭?"

答曰: "《维摩经》云: 『如、无有生,如、无有灭。』如者、真如佛性,自性清净。清净者,心之原也。真如本有,不从缘生。又云: 『一切众生,皆如也,众贤圣亦如也;一切众生者,即我等是也;众贤圣者,即诸佛是也。』名相虽别,身中真如法性,并同不生不灭。故言皆如也。故知自心本来不生不灭。"

问曰: "何名自心为本师?"

答曰:"此真心者,自然而有,不从外来,不属于修。于三世中, 所有至亲莫过自守于心。若识心者,守之则到彼岸。迷心者,弃之则 堕三涂。故知三世诸佛以自心为本师。故论云:了然守心,则妄念不 起则是无生,故知心是本师。"

问曰:"何名自心胜念彼佛?"

答曰:"常念彼佛,不免生死;守我本心,则到彼岸。《金刚经》云:『若以色见我,以音声求我,是人行邪道,不能见如来。』故云:『守本真心胜念他佛。』又云:『胜者只是约行劝人之语,其实究竟果体平等无二。』"

问曰: "众生与佛真体既同,何故谓诸佛不生不灭,受无量快乐,自在无碍。我等众生,堕生死中,受种种苦耶?"

答曰:"十方诸佛,悟达法性,皆自然照,燎于心源,妄想不生,正念不失,我所心灭,故不得受生死。不生死故,即毕竟寂灭。故知万乐自归。一切众生迷于真性,不识心本,种种妄缘,不修正念,故即憎爱心起。以憎爱故,则心器破漏;心器破漏故,即有生死;有生死故,则诸苦自现。《心王经》云:『真如佛性,没在知见;六识海中,沉沦生死,不得解脱。』努力会是,守本真心,妄念不生,我所心灭,自然与佛平等无二。"

问曰:"真如法性,同一无二;迷应俱迷,悟应俱悟。何故佛觉性,众生昏迷,因何故然?"

答曰:"自此己上,入不思议分,非凡所及;识心故悟,失性故迷;缘合即合,说不可定;但信真谛,守自本心。故《维摩经》云:『无自性、无他性,法本无生,今即无灭。』此悟即离二边,入无分别智。若解此义,但于行知法要,守心第一。此守心者,乃是涅盘之根本,入道之要门,十二部经之宗,三世诸佛之祖。"

问曰:"何知守本真心,是涅盘之根本?"

答曰:"涅盘者,体是寂灭,无为安乐;我心既是真心,妄想则断;妄想断故,则具正念;正念具故,寂照智生;寂照智生故,穷达法性;穷达法性故,则得涅盘。故知守本真心,是涅盘之根本。"

问曰:"何知守本真心,是入道之要门?"

答曰: "乃至举一手爪,画佛形像,或造恒沙功德者; 只是佛为教导无智能众生,作当来胜报之业,及见佛之因。若愿自早成佛者,会是守本真心。三世诸佛,无量无边,若有一人不守真心得成佛者,无有是处。故经云: 『制心一处,无事不办。』故知守本真心,是入道之要门也。"

问曰:"何知守本真心,是十二部经之宗?"

答曰:"如来于一切经中,说一切罪福,一切因缘果报;或引一切

山河大地草木等,种种杂物,起无量无边譬喻;或现无量神通,种种变化者;只是佛为教导无智能众生,有种种欲心,心行万差。是故如来随其心门引入一乘。我既体知众生佛性,本来清净,如云底日,但了然守本真心,妄念云尽,慧日即现:何须更多学知见,所生死苦。一切义理及三世之事,譬如磨镜,尘尽明自然现。则今于无明心中学得者,终是不堪。若能了然不失正念,无为心中学得者,此是真学。虽言真学,竟无所学。何以故?我及涅盘,二皆空故。更无二无一,故无所学。法性虽空,要须了然守本真心;妄念不生,我所心灭。故《涅盘经》云:『知佛不说法者,是名具足多闻。』故知求本真心,是十二部经之宗也。"

问曰:"何知守本真心,是三世诸佛之祖?"

答曰: "三世诸佛,皆从心性中生。先守真心,妄念不生,我所心灭,后得成佛。故知守本真心,是三世诸佛之祖也。上来四种问答,若欲广说何穷! 吾今望得汝自识本心是佛,是故殷懃劝汝。千经万论,莫过守本真心是要也。吾今努力按《法华经》,示汝大车、宝藏、明珠、妙药等物,汝自不取、不服、穷苦奈何! 会是妄念不生,我所心灭,一切功德,自然圆满,不假外求,归生死苦。于一切处,正念察心,莫爱现在乐,种未来苦;自诳诳他,不脱生死。努力努力! 今虽无常,共作当来成佛之因;莫使三世虚度,枉丧功夫。经云: 『常处地狱,如

游园观,在余恶道,如己舍宅。』我等众生,今现如此,不觉不知,惊怖煞人,了无出心。

奇哉奇哉!若有初心学坐禅者,依《观无量寿经》端坐正念,闭目合口,心前平视,随意近远;作一"日"想,守真心念念莫住,即善调气息。莫使乍麤乍细则令人成病苦。夜坐禅时,或见一切善恶境界,或入青黄赤白等诸三昧,或见身出大光明,或见如来身相,或见种种变化;但知摄心莫着,并皆是空,妄想而见也。经云:『十方国土,皆如虚空,三界虚幻,唯是一心作。』若不得定,不见一切境界者,亦不须怪。但于行住坐卧中,常了然守本真心,会是妄念不生,我所心灭。

一切万法不出自心,所以诸佛广说,如许多言教譬喻者,只为众生行行不同,遂使教门差别。其实八万四千法门,三乘八道位体,七十二贤行宗,莫过自心是本也。若能自识本心,念念磨炼;莫住者,即自见佛性也。于念念中,常供养十方恒沙诸佛。十二部经,念念常转。若了此心源者一切心义自现,一切愿具足一切行满,一切皆办,不受后有。会是妄念不生,我所心灭,舍此身已,定得无生,不可思议。努力莫造作,如此真实不妄语,难可得闻,闻而能行者,恒沙众中,莫过有一。行而能到者,亿万劫中,希有一人。好好自安自静,善调诸根,就视心源。恒令照燎清净,勿令无记心生。"

问曰:"何名无记心?"

答曰:"诸摄心人为缘外境麤心小息,内炼真心;心未清净时,于行住坐卧中,恒惩意看心,犹未能了了清净、独照心源,是名无记心也。亦是漏心,犹不免生死大病,况复总不守真心者;是人沉没生死苦海,何日得出?可怜!努力努力!经云:『众生若情诚不内发者,于三世纵值恒沙诸佛,无所能为。』经云:『众生识心自度,佛不能度众生。』若佛能度众生者,过去诸佛恒沙无量,何故我等不成佛也?只是情诚不自内发,是故沉没苦海。努力努力!

勤求本心,勿令妄漏。过去不知,已过亦不及;今身现在,有遇得闻妙法,分明相劝,决解此语,了知守心,是第一道。不肯发至诚心,求愿成佛,受无量自在快乐,乃始轰轰随俗贪求名利,当来堕大地狱中,受种种苦恼,将何所及。奈何奈何!努力努力!但能着破衣飧麤食,了然守本真心,佯痴不解语,最省气力,而能有功,是大精进人也。世间迷人不解此理,于无明心中,多涉艰辛,广修相善,望得解脱,乃归生死。若了然不失正念,而度众生者,是有力菩萨。分明语汝等,守心第一,若不勤守者,甚痴人也。不肯现在一生忍苦,欲得当来万劫受殃,听汝更不知何嘱?八风吹不动者,真是珍宝山也。若知果体者,但对于万境起恒沙作用,巧辩若流,应病与药,而能妄念不生,我所心灭者,真是出世丈夫;如来在日,叹何可尽!吾说此言者,至心劝汝,不生妄念,我所心灭,则是出世之士。"

问曰: "云何是我所心灭?"

答曰: "为有小许胜他之心,自念我能如此者,是我所心,涅盘中病故。《涅盘经》曰: 『譬如虚空,能容万物,而此虚空不自念言我能含容如是。』此喻我所心灭,趣金刚三昧。"

问曰:"诸行人求真常寂者,只乐世间无常麤善,不乐第一义谛真常妙善;其理未见,只欲发心缘义,遂思觉心起,则是漏心;只欲亡心,则是无明昏住。又不当理,只欲不止,心不缘义,即恶取空,虽受人身,行畜生行;尔时无有定慧方便,而不能解了,明见佛性。只是行人沉没之处,若为超得到无余涅盘,愿示真心。"

答曰:"会是信心具足,志愿成就,缓缓静心,更重教汝;好自闲静身心,一切无所攀缘,端坐正念,善调气息;惩其心不在内、不在外、不在中间,好好如如,稳看看熟,则了见此心识流动,犹如水流,阳焰晔晔不住。既见此识时唯是不内不外,缓缓如如,稳看看熟,则返覆销融,虚凝湛住。其此流动之识,飒然自灭。灭此识者,乃是灭十地菩萨众中障惑。此识灭已,其心即虚,凝寂淡泊,皎洁泰然;吾更不能说其形状。

汝若欲得者,取《涅盘经》第三卷中金刚身品,及《维摩经》第三卷见阿閦佛品,缓缓寻思,细心搜捡熟看,若此经熟,实得能于行住坐卧,及对五欲八风,不失此心者,是人梵行已立,所作已办,究

竟不受生死之身。五欲者:色声香味触。八风者:利衰毁誉称讥苦乐。此是行人磨炼佛性处,甚莫怪,今身不得自在。"经曰:『世间无佛住处,菩萨不得现用。要脱此报身,众生过去根有利钝,不可判;上者一念间,下者无量劫。若有力时,随众生性,起菩萨善根,自利利他,庄严佛土。要须了四依,乃穷实相。若依文执,则失真宗。』诸比丘!汝等学他出家修道,此是出家,出生死枷,是名出家。正念具足,修道得成,乃至解身支节,临命终时,不失正念,即得成佛。弟子上来集此论者,直以信心依文取义,作如是说,实非了了证知。若乘圣理者,愿忏悔除灭;若当圣道者,回施众生,愿皆识本心,一时成佛。闻者努力,当来成佛,愿在前度我门徒。

问曰:"此论从首至末,皆显自心是道,未知果行二门,是何门摄?" 答曰:"此论显一乘为宗。然其至意,导迷趣解,自免生死,乃能 度人。直言自利,不说他利,约行门摄。若有人依文行者,即在前成 佛。若我诳汝,当来堕十八地狱,指天地为誓,若不信我,世世被虎 狼所食。"